

REGLUGERÐ

um Iðnþróunarsjóð.

1. gr.

Heiti sjóðsins er Iðnþróunarsjóður (Nordisk Industrialiseringsfond for Island). Heimili sjóðsins og varnarþing er í Reykjavík. Stofnaðilar sjóðsins eru ríkisstjórnir Danmerkur, Finnlands, Íslands, Noregs og Svíþjóðar. Stofnaðilar hafa gert með sér sérstakan stofnsamning fyrir sjóðinn dags. 12. desember 1969, og viðbótarsamning við stofnsamning, dags. 29. apríl 1980, og viðbótarsamning við stofnsamning, dags. 21. mars 1986, og eru þeir birtir sem fylgiskjöl með lögum um Iðnþróunarsjóð nr. 9 frá 13. febrúar 1970, sbr. lög nr. 43 frá 23. maí 1980 og lög nr. 59 frá 19. júní 1985 og hafa ákvæði þeirra lagagildi hér á landi.

2. gr.

Tilgangur sjóðsins er að stuðla að uppbyggingu alhliða og samkeppnishæfs atvinnulífs á Íslandi og skal hann leggja megináherslu á tækni- og iðnþróun og samvinnu á sviði iðnaðar og viðskipta milli Íslands og hinna Norðurlandanna.

3. gr.

Stofnfé sjóðsins skal vera jafnvirði 14 milljóna Bandaríkjadollara, sem stofnaðilar leggja fram skv. stofnsamningi frá 12. desember 1969. Ábyrgð Danmerkur, Finnlands, Noregs og Svíþjóðar á skuldbindingum sjóðsins er takmörkuð við hlutdeild þeirra í stofnfénu á hverjum tíma. Ísland er á sama hátt ábyrgt fyrir skuldbindingum sjóðsins með sínum hluta stofnfjárins og ber auk þess eitt ábyrgð á þeim skuldbindingum umfram stofnféð, sem sjóðurinn kann að taka á sig vegna ábyrgða og lántöku.

4. gr.

Reikningseining sjóðsins skal vera jöfn einum Bandaríkjadala. Lán, sem tekin eru í öðrum gjaldmiðli en Bandaríkjadala, skulu endurlánuð í sama gjaldmiðli. Lán, sem veitt eru af eigin fé sjóðsins, má veita í öðrum gjaldmiðli en Bandaríkjadala, eftir ákvörðun stjórnar sjóðsins. Útistandandi lán í Bandaríkjadöllum mega þó aldrei nema lægri upphæð en sem nemur stofnframlögum eins og þau eru á hverjum tíma, að viðbættum lánum teknum í Bandaríkjadöllum. Verði breyting á stofngengi eða raunverulegu sölugengi þessara gjaldmiðla og þar með reikningseiningu sjóðsins, breytast eftirstöðvar lána, svo og greiðslur vaxta og afborgana í samræmi við það.

5. gr.

Sjóðurinn starfar að verkefnum sínum með því:

- a) að veita lán til ákveðinna verkefna annað hvort einn eða í samvinnu við aðra aðila.
- b) að ábyrgjast lán sem veitt eru af öðrum aðilum.
- c) að kaupa í sérstökum tilvikum hlutabréf í nýjum og starfandi fyrirtækjum, enda verði að því stefnt að selja hlutabréfin strax og aðstæður leyfa og hagkvæmt þykir.
- d) að veita í sérstökum tilvikum lán með hagstæðum kjörum eða framlög, m. a. til tækniaðstoðar, rannsókna, vöruþróunar og markaðsathugana. Slík lán eða framlög mega samtals ekki nema meira en 10% af stofnfénu. Frá og með árinu 1980 er í sama tilgangi heimilt að ráðstafa til viðbótar 10% af eigin fé sjóðsins eins og það var í byrjun ársins 1980, auk 10% af rekstrarafgangi hvers árs. Í fyrsta skipti af rekstrarafgangi ársins 1980.

Fé til ofangreindrar starfsemi fær sjóðurinn af stofnfé sínu, tekjum og með lántökum. Ákvarðanir um lánveitingar, hlutabréfakaup og ábyrgðir skulu vera í samræmi við almenn

viðskiptasjónarmið. Sjóðurinn skal stefna að því að tryggja eðlilega ávöxtun stofnfjár og eigin fjár. Lán, framlög eða ábyrgðir má veita til fyrirtækja í einkaeign eða í eigu opinberra aðila og til fjárfestingarlánasjóða sem hafa sama tilgang og sjóðurinn. Sama gildir um kaup á hlutabréfum. Þess skal ávallt gætt að á móti óendurgreiddum stofnframlögum og lánum til sjóðsins standi lán með fullnægjandi tryggingum. Sjóðurinn skal hafa náð samstarf við íslenskar lánastofnanir.

Prátt fyrir heimildir í ákvæðum 4. liðar c) og 2. og 3. mgr. sama liðar samningsins og samsvarandi staflíðs og mgr. hér að framan um kaup sjóðsins á hlutabréfum í fyrirtækjum eru þær heimildir takmarkaðar, þar til annað verður nánar ákveðið, við að kaupa hlutabréf í hlutafélögum sem ríkið á hlut í og stofnuð eru með heimild í lögum eða samkvæmt sérstakri ríkisstjórnarsamþykkt. Breyting á þessu ákvæði reglugerðarinnar skal háð samþykki iðnaðarráðherra Norðurlandanna.

6. gr.

Sjóðurinn skal hafa stjórn, framkvæmdastjórn og framkvæmdastjóra.

7. gr.

Stjórn sjóðsins skal skipuð fimm mönnum, einum frá hverju aðildarríki. Varamaður skal skipaður fyrir hvern stjórnarmann. Menn þessir skulu skipaðir til þriggja ára í senn. Iðnaðarráðherra skipar fulltrúa Íslands og varamann hans. Fulltrúa og varamenn hinna ríkjanna skipa stjórnvöld hvers ríkis eftir reglum, er þau setja. Sjóðurinn greiðir laun stjórnarmanna og framkvæmdarstjórnarmanna skv. ákvörðun iðnaðarráðherra.

8. gr.

Stjórn sjóðsins kýs sér formann til eins árs í senn, frá 1. maí til jafnlengdar næsta ár á eftir. Engar bindandi ákvarðanir má taka, nema a. m. k. 3 stjórnarmenn eða varamenn þeirra séu á fundi. Hver stjórnarmaður fer með eitt atkvæði. Til ákvörðunar þarf meirihluta atkvæða, og skal atkvæði íslenska stjórnarmannsins vera þar með.

9. gr.

Stjórn sjóðsins skal halda a. m. k. tvo fundi á ári. Formaður stjórnar og framkvæmdastjóri boða til og undirbúa fundi. Fund skal boða, komi fram ósk um það frá einum eða fleiri stjórnarmanna. Framkvæmdastjóri er ritari á fundum stjórnarinnar.

10. gr.

Stjórn sjóðsins tekur ákvarðanir um málefni hans, en í því felst m. a.:

- a) að taka ákvarðanir um lánveitingar og setja lágmarksskilyrði fyrir þeim og um ábyrgðir, sem veita á og kaup á hlutabréfum skv. ákvæðum 5. gr.,
- b) að taka ákvarðanir um lántökur,
- c) að taka ákvarðanir um vaxta- og útlánskjör sjóðsins,
- d) að ráða framkvæmdastjóra að fengnum tillögum framkvæmdastjórnar,
- e) að setja framkvæmdastjóra starfsreglur með erindisbréfi eftir tillögum framkvæmdastjórnar,
- f) að fela framkvæmdastjórninni eftir því, sem hún telur heppilegt, að taka ákvarðanir um starfsemi sjóðsins, þ. m. t. lánveitingar,
- g) að skipa tvo menn til að endurskoða bókhald og reikninga sjóðsins, og skal annar þeirra vera löggiltur endurskoðandi og hinn aðalendurskoðandi Seðlabanka Íslands,
- h) að úrskurða reikninga sjóðsins og taka ákvarðanir um ráðstöfun tekjuafgangs svo og um afskriftir krafna sjóðsins, að fengnum tillögum framkvæmdastjórnar.

11. gr.

Iðnaðarráðherra skipar fimm menn í framkvæmdastjórn eftir tilnefningu eftirtalinna aðila: Landsbanka Íslands, Iðnaðarbanka Íslands hf., Iðnlánasjóðs, Útvegsbanka Íslands og Búnaðarbanka Íslands, sem hver tilnefnir einn mann. Varamenn skulu skipaðir á sama hátt, og skal skipunartími aðalmanna og varamanna vera þrjú ár. Ráðherra skipar formann framkvæmdastjórnar, en hún skiptir með sér verkum að öðru leyti. Framkvæmdastjóri undirbýr fundi framkvæmdastjórnar í samráði við formann hennar. Fundi skal halda eftir því sem þörf krefur, en þó að jafnaði eigi sjaldnar en tvisvar í mánuði.

12. gr.

Verkefni framkvæmdastjórnar eru einkum þessi:

- a) að gera tillögur til sjóðsstjórnarinnar um þau mál, er sjóðsstjórnin tekur ákvörðun um, þar á meðal um lántökur, lánveitingar, kaup á hlutabréfum skv. 5. gr., framlög, ábyrgðir, ráðstöfun tekjuafgangs og afskriftir,
- b) að gera tillögu um ráðningu framkvæmdastjóra,
- c) að taka ákvarðanir um starfsemi sjóðsins, þar með talið lánveitingar, hlutabréfakaup skv. 5. gr. og framlög, eftir því sem sjóðsstjórnin felur henni, sbr. 10. gr.,
- d) að afgreiða lánveitingar og ábyrgðir skv. samþykktum sjóðsstjórnar,
- e) að undirrita skjöl sjóðsins, hafa umsjón með rekstri hans og starfsemi,
- f) að vinna að því í samstarfi við sjóðsstjórnina, að tilgangi með stofnun sjóðsins verði sem best náð.

13. gr.

Framkvæmdastjóri sjóðsins ber ábyrgð á ráðningu og uppsögn starfsfólks og daglegum rekstri. Hann annast vörslu eigna sjóðsins, hefur yfirumsjón með bókhaldi, úrvinnslu lánsúmsókna og fer með prókúruumboð fyrir sjóðinn.

14. gr.

Til að skuldbinda sjóðinn þarf undirskrift tveggja manna, sem eiga sæti í framkvæmdastjórninni.

15. gr.

Seðlabanki Íslands skal veita sjóðnum nauðsynlega fyrirgreiðslu og starfsaðstöðu, að því er varðar húsnæði, bókhald, afgreiðslu, daglega endurskoðun, lögfræðilega þjónustu, innheimtu, geymslu verðbréfa o. fl. Sjóðurinn endurgreiðir útlagt fé vegna þessa.

16. gr.

Bókhaldsár sjóðsins skal vera hið sama og almanaksárið. Í lok hvers bókhaldsárs semur framkvæmdastjórn sjóðsins skýrslu um starfið á árinu og leggur hana ásamt endurskoðuðum og árituðum ársreikningum fyrir stjórn sjóðsins til samþykktar í síðasta lagi 1. maí næstan á eftir. Samþykktir ársreikningar ásamt ársskýrslu skulu lagðir fyrir iðnaðarráðherra eigi síðar en 1. júní.

17. gr.

Halda skal árlega ársfund Iðnþróunarsjóðs. Rétt til setu á ársfundi eiga eftirtaldir aðilar:

- a) stjórn og framkvæmdastjórn Iðnþróunarsjóðs,
- b) fjórir menn tilnefndir af iðnaðarráðherra og tveir tilnefndir af sérhverjum þeim sem tilnefnir mann til setu í framkvæmdastjórn.

Framkvæmdastjóri Iðnþróunarsjóðs situr ársfundinn svo og þeir sem stjórn eða framkvæmdastjórn bjóða sérstaklega til fundarins.

Á ársfundinum skal kynna ársreikninga og ársskýslu sjóðsins og ræða atriði er þar koma fram. Þá skal á ársfundinum ræða þátt sjóðsins í tækni og iðnþróun á Íslandi eftir því sem ástæða er til.

Formaður stjórnar sjóðsins eða sá sem hann tilnefnir stýrir ársfundi.

18. gr.

Iðnþróunarsjóður er undanþeginn opinberum gjöldum og sköttum til ríkissjóðs og sveitarsjóða á sama hátt og Seðlabanki Íslands. Sjóðurinn er og undanþeginn stimpilgjaldi af fjárskuldbindingum, sem hann kann að taka á sig.

19. gr.

Reglugerð þessi sem sett er samkvæmt tillögum stjórnar Iðnþróunarsjóðs og með heimild í lögum nr. 9 frá 13. febrúar 1970 með áorðnum breytingum skv. lögum nr. 43 frá 23. maí 1980 og lögum nr. 59 frá 19. júní 1985, öðlast þegar gildi. Jafnframt fellur úr gildi reglugerð nr. 120, 18. maí 1972, með áorðnum breytingum.

Iðnaðarráðuneytið, 18. júlí 1986.

Albert Guðmundsson.

Halldór J. Kristjánsson.

**um forkaupsrétt Svalbarðsstrandarhrepps að fasteignum innan
sveitarfélagsins.**

Samkvæmt heimild í lögum nr. 22/1932 um forkaupsrétt kaupstaða og kauptúna á hafnarmannvirkjum o. fl. og 26. gr. skipulagslaga nr. 19/1964 hefur hreppsnefnd Svalbarðsstrandarhrepps gert eftirfarandi samþykkt:

Svalbarðsstrandarhreppi er áskilinn forkaupsréttur að eftirtöldum lóðum og mannvirkjum:

Svalbarðseyri ásamt mannvirkjum.

1. Um er að ræða landssvæði sem takmarkast af eftirfarandi: að sunnan merkjalína milli Svalbarðs og Mógils, að austan takmarkast lóðin af brekkunni og norður fyrir svokallað Línadalshús.

Þá tekur við síki og liggja mörkin austan við það allt út að svokölluðu Pálshúsi en eftir það norður eystri bakka Svalbarðstjarnar að línu er dregin sé þvert austur úr ós þeim er grafinn er úr tjörninni til sjávar skammt norðan við vitann.

Landið er 26 885m² að stærð samkvæmt fasteignamati.

2. Öll mannvirki sem eru á fyrrgreindu landsvæði.

Samþykkt þessi öðlast þegar gildi og gildir í 5 ár frá dagsetningu hennar að telja. Birtist hún til upplýsinga fyrir þá sem hlut eiga að máli.

Félagsmálaráðuneytið, 18. júlí 1986.

F. h. r.

Hallgrímur Dalberg.

Þorgerður Benediktsdóttir.